

सर्गः

थः हे विस्तृत



डा. आनन्द जोशी

रुबरिक, यँ व कुतः पिकाकया मंकाः पिथना

सर्गः थः हे विस्तृत

डा. आनन्द जोशी



रुबरिक

यँ, नेपालमण्डल,
नेपाः



कुतः पिकाक

ख्वप, नेपालमण्डल,
नेपाः

सर्गः थः हे विस्तृत/9



सर्गः थः हे विस्तृत : डा. आनन्द जोशी

विधा : हाइकु
पिकाक : रूवरिक, यँ व कुतः पिकाक, तिबुक्छें-८, खप, नेपालमण्डल, नेपाः
द्यबःकिपा : साजन नकःमि, यँ
नहापां : स्वसः (३००)गू
: ने.सं. ११३४ चिल्लाथ्वः फागु पुन्हि
: बु.सं. २५५६/ वि.सं. २०७०/ सन् २०१४
मू : सच्छि (१००१-) तका

ISBN : 978-9937-8701-6-0

SARGAH THAH HE VISTRIT

By Dr. Ananda Joshi (NEPAL BHASHA)

थाकू : न्हू-विद्या प्रिण्टिङ्ग प्रेस, सुकुधवाखा, खप, नेपालमण्डल, नेपाः ।

डा. आनन्द जोशी/२

लुपाः

नेपालभाषाय् कविता विधा नापं विभिन्न विधाया सफू पिकयावनेगु जिमिगु अभियानया भवलय् थुगुसिइ डा. आनन्द जोशीया न्हूगु हाइकु मुना पिकाये दुगुलिं जिपिं तसकं लय्ताः । थौं वयाः हाइकु धाः नं मनूया जीवन, लकस, विकासया विभिन्न पक्षयात चिन्तन मनन याना न्हूगु दिशा बिइत सफल जुजुं वंगु दु । थ्व प्रयासं भीगु सोचाइलय्, भीगु दृष्टिकोणय् व भीगु धारणाय् तक नं यक्व हिउपाः हयेत सफल जूवंगु खनेदु । थ्व हे थौंया हाइकुया उपलब्धि सफलता धायेमाः । थ्व प्रकाशन जूगु हाइकु मुनां हाइकुया क्षेत्रय् न्हूगु दिशा इंगित याना वनेत वःबिइ धयागु विश्वास जिमिसं कयाच्चना । हाइकुया च्वज्या जूगु न्यय्दँ दःसां डा. आनन्द जोशीं थुगु ख्यलय् पलाः च्वयेका हाइकुया ख्यलय् न्हूगु धार हयादीगु दु । वय्कलं हाइकु जक च्वया मखु, हाइकु सम्बन्धि थीथी च्वसु च्वयेगुया नापं नेपालभाषाया हाइकु गुकथं न्ह्याःवनेमाः धयागु दिशा निर्देश याना ज्यापौ च्वयाः सकल हाइजिनतय् न्ह्यःने न्ह्यब्वया दियेधुंकूगु खँ थन लुमकेबहः जू ।

थुपालय् कवि व हाइजिन डा. आनन्द जोशीया स्वंगूगु हाइकु मुना सफू 'सर्गः थः हे विस्तृत' रुवरिक व कुतः पिकाकं मंकाःकथं पथने दयाः जिपिं तसकं लय्ताः । थुकथं हे वय्कलं हाइकु सिर्जना यानाः हाइकु सम्बन्धि च्वसु च्वयाः वनेफयेमाः । रुवरिक व कुतः पिकाकयात थुगु सफूया पिकाक जुयेगु ह्वःताः बियादीगुलिं कवि व हाइजिन डा. आनन्द जोशीयात यक्व यक्व सुभाय् द्यछानाच्चना ।

रुवरिक व कुतः पिकाक

ने.सं. १९३४ सिल्लागाः सिलाचहे

थःगु खँ

डा. आनन्द जोशी

ईनापया यात्राय् बुयाबिइगु हिउपालं, उपलब्धिं, समस्यां, विकल्पया लं जिन्दगीयात प्रभावित याना हे च्वनि । थन्याःगु हे श्रृखलां जि, जिगु बिचाः, जिगु धारणा, जिगु न्ह्याःवंगु तुतियात नं अनेक तबरं प्रभावित याना हे च्वंगु दु । थःगु बिचाः, थःगु जीवन दर्शन, थःगु म्वायेगु प्रतिया दृष्टिकोण, कन्हेया यात्रा, थःदुनेया अन्तर संघर्ष, अन्तर चिन्तन मननं पिहां वःगु मूतियात जिं न्ह्याबले काव्य विधाय् अभिव्यक्त याना मूर्तरूप बिइत स्वयाच्चना । खः थ्व हे प्रवृत्तिं जितः म्वायेत, न्ह्याःवनेत, थःत व्यक्त यायेत ग्वाहालि याना च्वं थें च्वं । काव्यविधा मध्ये जिं न्हापानिसें कविता धाःयात हे माध्यमया रूप्य् प्रयोग यानाः वयाच्चना । तर चिहाकःगु संरचनाय् जिगु अभिव्यक्तियात सशक्तरूपं व्यक्त यायेगु सयन्त्र जिं मालाः जुयागु तःदँ दत्त । ने.सं. १९३०दँय् जक जिं मालागु थन्याःगु संरचना लुयावल, व खः हाइकु ।

थ्व प्रकाशन जूगु सर्ग थः हे विस्तृत हाइकु मुनाय् जि न्हूगु दृष्टिकोण, न्हूगु बिचाः, विषय तथा विम्व उपयोग यानागु दु । थ्व सफुतिइ जिं थौंया स्थिति, जीवन, व्यवस्था, संघर्ष, आत्म विश्लेषण, खोजयात व्वयेत प्रयास यानागु दु । थ्व सफू दुनेया हाइकु नं भीगु थौंया हाइकुया विकासय् छपाः अप्पा तनेत भीगु हाइकुयात विश्वय् थःगु पन क्यनेत न्ह्याःवंगु अभियानयात ग्वाहालि याइ धयागु जितः विश्वास दु ।

थ्व सफूयात मूर्तरूप बिइत प्रेरणा बियादिइपिं डा. कुन्जनी, डा. रुवी, ई. रिक्कि, डा. शिशिर व डा. मेरिनयात दुनुगलं निसें सुभाय् दु । थ्व सफू पिकायेत जितः घ्वाना न्ह्यःने यंकूगु संस्था रुबरिक व कुतः पिकाकयात व थ्व सफूया भाय् भिंकाः सफूया प्रुफ स्वयाः बियादीम्ह हाइजिन विमल ताम्राकारयात नं यक्व सुभाय् दु ।



मह्याडु डल. रुवी ऑशी बाताऑु



काडु ई. रलक ऑशी

नह्याःवनेगु हे ऑीवन खः

थुव वलशुवास नापं

थमहं हे लँ दयेका, नह्याःवनाः


थःत वुतुत यांनाः वनाऑुवंपलं

ऑलमल मह्याडु डल. रुवी व काडु ई. रलक

इमलत व नहूगु पलंढीतडुत

थुव सफू ।


- आननुद व कुनुऑनी



धलः

- जलु धारणा : हाइकु वलकास व कन्हय्या लँ
थौया हाइकुया सैद्धान्तलक पक्ष, वलशेषता व वलस्तार ९-२२
- हाइकु २३-५४
- परलशलषुटाङ्क
(क) डा.आनन्द जोशीया हाइकु सम्बन्धल वलभलन्न
सालहत्यकारतयुगु धापू ५५-५६


सर्गः थः हे वलस्तुत/७





जिगु धारणा : हाइकुया विकास व कन्हय्या लँ

सर्ग: थ: हे विस्तृत/९



थौया हाइकुया सैद्धान्तिक पक्ष, विशेषता व विस्तार

पृष्ठभूमि

खुसः न्हयसःदैनिसें हाइकुया विकास (Swede, 1997) क्रमिकरुपं जुयाः वनाच्चंगु जूसां थ्व धाःया प्रवाह व विस्तार एकनासं छगू हे तरिकां जुयावंगु खनेमदु । यात्राया क्रमय् यक्व उथलपुथल, यक्व हिउपाः, धारणाय् परिवर्तन, यक्व शंका तथा संभावना बुयाः, ब्वलनावंगु खनेदु । डा. आनन्द जोशी (१९३३क)या धापू अनुसार विश्वय् हाइकुया विकास स्वंगू किसिमं न्ह्याःवनाच्चंगु दु -

(१) हाइकुया परम्परागत सिद्धान्त, संरचना व प्रस्तुतीकरणया तरिकायात नालाः बहुसंख्यक विकसित देसं हाइकुया विकासयात तिवः बियाः वनाच्चंसां छुं देय्सं थ्व धाःया शुरुया स्वरुप, विषयया लागा, हाइकुया तत्वयात थःगु हे तालं हिलाः, माःकथं इलय्ब्यलय् संशोधन यानाः हाइकुयात न्हूगु रुप बियाः व न्हूगु संरचनाय् हिलाः यंकेगु कुतः यानाः न्ह्याःवनाच्चंगु दु ।

(२) जापानं कय्च्यानाः वनाच्चंगु हाइकुया परम्परागत सैद्धान्तिक पक्ष, स्वरुप व धारणायात हे नालाः आः नं यक्व देसं हाइकुया विकासयात न्ह्यःने यंकाच्चंगु दु ।

(३) हाइकुया प्रचलित सिद्धान्त, संरचना व हाइकुइ दयेमाःगु अंश अध्ययन यानाः थःगु देय्या स्थिति, वर्तमान जीवन व भोगय् यानाच्चंगु जिन्दगीया समस्या, अन्तरपीडा, चाहना, संघर्ष व विद्रोहयात अभिव्यक्त यायेगु माध्यमया रुपय् संशोधन यानाः थःगु हे पनया विम्व, प्रकृतिया पक्षनाप मेमेगु तत्वयात नं विषयवस्तुइ दुथ्याकाः छुं छुं देसं हाइकुया विकासया धाःयात तब्याः याना यंकाच्चंगु दु ।

ई अनुसार न्ह्यागुं धारणाय्, सिद्धान्तय्, मूल्यय्, मान्यताय्, व आधारय् हिउपाः वयाः, थ्व क्रमं मनूतय्गु म्वायेगु पहलय्, व्यवहारय्, बिचालय् व कार्यान्वयन यायेगु प्रयासय् तक नं प्रभावित यानाच्चनी । इलय् ब्यलय् हाइकुया सिद्धान्तय्, स्वरुपय्, बिचालय्, विम्व चयनय्, कथ्य प्रस्तुति यायेगु तरिकाय् परिवर्तन वयाः हाइकुया प्रवाहयात विभिन्न दिशाय् मोडय् याना यंकाच्चंगु दसि विद्यमान


हे दु । ईया माग अनुरूप खने दःवइगु वा जुइगु हिउपाःयात अस्वाभाविक धाये फइमखु, थन्याःगु हिउपाः स्वाभाविक जुयाः जीवनयात न्हूगु तालं गति प्रदान यानाः न्हूगु हे बिस्कं लँ लुइकाः न्ह्याःवनेत ग्वाहालि याइ । थौकन्हय् हाइकुया विभिन्न पक्षय्, तत्वय्, विषयवस्तुइ यक्व हिउपाः वयाच्वंगु दु । परम्परागत सीमित विषय क्षेत्र नापनापं मेमेगु क्षेत्र नं एकिकृत याना न्हूगु विम्व दुथ्याकाः, न्हूगु दृष्टिं विश्लेषण यानाः प्रकृति व जीवनया स्वापूयात विभिन्न तरिकां चिन्तन मनन याना न्हूगु हे आयामया सृजना यानाः वनाच्वंगु दु । जीवन व सम्बन्धित विभिन्न तत्त्वनाप स्वापू स्थापित व विकास जुयावंगु बहुआयामिक धारणां व अनुभवं पिज्वःगु अनुभूतियात समष्टिरूपं व्यक्त यायेगु अभियानया रूपय् “थौया हाइकु” (न्हू हाइकु, समसामयिक हाइकु, Modern Haiku) न्ह्याःवंगु दु, थ्व प्रयासं हाइकुया ख्यःयात चकंका यंकेत महत्वपूर्ण भूमिका म्हिता वनाच्वंगु दु ।

थौया हाइकुया सैद्धान्तिक पक्ष

वर्तमान जिन्दगी, लकसया स्थिति, मनूतय्सं भोगय् यानाच्वंगु अन्तरसंघर्ष, अन्तरद्वन्द्व, लँया खोज आदि विषयलय् चिन्तन मनन याना प्याहां वःगु बिचाःयात अभिव्यक्त यायेगु संयन्त्र रूपय् थौया हाइकु विकास जुयाः वनाच्वंगु दु । थ्व इलय् विभिन्न देसं थौया हाइकु (Modern Haiku)यात प्रादूर्भाव यानाः थःगु हे किसिमं इतिहास दयेका वनेत प्रयत्नरत जुयाच्वंगु दु, दुसां थ्वया सिद्धान्तय्, धारणाय्, तत्व समावेश यायेगु पहलय्, तथा बिचाःयात अभिव्यक्त यायेगु तरिकाय् एकरूपता धाःसा खनेमदु । गथेकि जापानय् न्हापा प्रकृति व थ्वया सम्बन्धित पक्षयात जक आधार याना हाइकु च्वयाः वयाच्वंगु परम्परागत तरिकाय् आः वयाः थौया हाइकुं जीवित दक्खिसित (मनू समेतयात) विषयवस्तुइ दुथ्याकाः यंकूगु दु (Kaneko Tohta, 2011) । अथेहे अमेरिकाय् मुख्य याना भौतिक विकास व मानवीय सम्बन्ध, थ्वया प्रतिफल व प्रभावयात प्राथमिकता बियाः थौया हाइकुइ व्यक्त यानाच्वंगु दु (Heuvel, 1986) । मेमेगु विकासोन्मुख देसं विशेष याना न्हिथंया घटना, जीवन व देशया स्थिति यात विषयवस्तुया छगू अंगया रूपय् समावेश याना हाइकुयात थःगु हे पन विइत कुतः न्ह्याकूगु दु । नेपालय् हाइकुया विकासयात स्वलधाःसा वहुसंख्यक हाइकुं म्हिगः तकया हाइकुया मुख्य तत्व प्राकृतिक विषय व थ्व नाप सम्बन्धित पक्ष, दृश्य, घटना तथा अन्तर स्वापू व द्वन्द्व आदियात

परम्परागत स्वरूपय् वा बनावटय् हे अभिव्यक्त यायेगुलि हे ततःमतः क्यनाः वना न्ह्याःवनाच्चंगु खनेदु । ख ला छुं छुं प्रकाशित हाइकुया विषय क्षेत्रय्, विम्व चयनय्, अनुभूतियात व्वयेगु तरिकाय् विविधतां व न्हूगु पन खने दयाच्चंगु दुसां, संस्थागतरुपं निश्चित धारणा तथा लँया विकास अझ नं जुइफुगु खने मदु । तर ने.सं. १९३०दँय् नेपालभाषाया हाइकु धालय् छगू महत्वपूर्ण हिउपाः वल, व खः थःगु हे पहया “थौया हाइकु”या विकास । थौया हाइकुइ वर्तमान जिन्दगीं भोगय् यानाच्चंगु यथार्थयात, अन्तर सम्बन्ध, अन्तरद्वन्द्व, संघर्ष, मनू मनूया स्वापू आदियात समावेश याना वनेगु थौया माग खः, थौया आवश्यकता खः धयागु घोषणा डा. आनन्द जोशीं थःगु सफू “खँवः सीमाहीन : सीमाहीन जि”(१९३०)या वक्तव्यय् व्यक्त यानादीगु दु । थौया हाइकु नं म्हिगःया सीमित विषयवस्तुया दायरां पिहां वयाः विभिन्न क्षेत्रयात एकिकृतरुपं चिन्तन मनन याना अभिव्यक्त याना वनेमाः धकाः डा. जोशीं जोड बियादीगु दु । थ्व सफू दुनेया हाइकुं न्हूगु हे पन, न्हूगु क्यानभास, न्हूगु स्वापू व न्हूगु आयाम प्रतिस्थापन यानाः ब्यूगु दु । निश्चय नं थ्व नेपालभाषाया हाइकु यात्राया तःधंगु उपलब्धि मानय् यायेमाः ।

‘थौया हाइकु’या अवधारणा, महत्व व वनेमाःगु लँ अझ स्पष्ट यायेगु उद्देश्यं डा. आनन्द जोशीं छगू कार्यपत्र ‘थौया हाइकु : छगू अभियान - अवधारणा, स्थिति व नीतिगत मार्गनिर्देशन’ तयार याना कार्यशालाय् प्रस्तुत यानादिल । थ्व कार्यपत्रय् छु कारणं, छु कमी पूरा यायेत, छु कमजोरी हटय् यायेत थौया हाइकु अभियानया रुपय् शुरु जूगु खः व थौया हाइकुया विशेषता व महत्व सम्बन्धय् स्पष्ट व्याख्या याना व्वयातःगु दु । थ्वनापं न्ह्याःवनेमाःगु लँ / दिशा नं इङ्गित याना न्ह्याःवनेत प्रेरित याःगु दु । थ्व अवधारणाय् स्वंगू क्षेत्रयात एकिकृत रुपं स्वयेमाःगु पाखे जोड बियातःगु दु : जीवन, लकस व विकास (चित्र १) । थ्व अवधारणाय् थौया जिन्दगीं भोगय् यानाच्चंगु स्थिति, अन्तर सम्बन्ध, अन्तर विकास व छगुलिं मेगु लिसे लाइगु प्रभावं प्रभावित जुइगु अवस्थायात उल्लेख याना हाइकुया विषयवस्तुयात एकिकृतरुपं विश्लेषण याना वनेत दिशा संकेत याःगु दु (आनन्द जोशी, १९३३ख) । जापानया Kigo database वेभसाइटय् प्रकाशित समाचारं थ्व अवधारणा नेपाःयात जक मखु, मेगु देयु लागि नं न्हूगु बिचाः जूगु दु धकाः उल्लेख याःगु दु (Dr. Gabi Greve, 2013) ।



श्रोत : डा. आनन्द जोशी (१९३३ख)

चित्र नं १ जीवन, लकस व विकासया अन्तर स्वाप्

“थौया हाइकु”या विशेषता व विषय क्षेत्र


थौया हाइकुं थ्व ईया प्रतिनिधित्व यानाच्चंगु यथार्थ खः । थ्व धाः नं जीवनया विभिन्न पक्ष, लकसय् विद्यमान श्रोतयागु अस्तित्व तथा स्थिति व मनूतय्सं थः म्वायेत व आधारभूत आवश्यकता पूर्ति यायेत कार्यान्वयन याःगु विभिन्न प्रयास दक्वयात एकिकृतरूपं विश्लेषण याना सिर्जना याइगु हाइकुइ मुख्य रूपं विद्यमान जुइमाःगु व जुइगु विशेषता क्वय् तालिका १य् उल्लेख दु । थ्व

डा. आनन्द जोशी/१४

दक्व विशेषता प्रत्येक हाइकुइ दयेमा: धयागु जरुरि मखु, तर समष्टिरुपं थ्व विशेषता हाइकुइ प्रतिविम्बित यायेगु कुत: जुइमा: । मेगु अर्थय् थौंया हाइकुचमिया धरातल ला थौंया सर्ग:; बँ, ल:, फय्, जीवन पद्धति, व्यवस्था, विकास, उन्नति, विनास, ध्वंश, आस्था, अनास्था, दुर्घटना, आत्म आलोचना आदिनाप सम्बन्धित जुइ, जुइ हे मा: ।

*This is an educational site for reference purposes of haiku poets worldwide. a project of the **World Kigo Database**
Dr. Gabi Greve, Daruma Museum, Japan*

Modern Haiku : Concept and Future Directives



ज्यापौ न्यव्यवचना दीमह डा. आनन्द जोशी ।

Recently a workshop related to Modern Haiku in Nepal was organized by the Haiku Foundation. In this workshop, the founder and leading modern poet Dr. Ananda Joshi presented a paper on the concept and future direction of Modern Haiku entitled "Modern Haiku : Concept, Status and Future Directive Policies". In the presentation, he gave a new concept integrating three interrelated and interdependent components: Life, Environment (surrounding features), and Development (Fig. 1). Modern haiku's dimension and coverage have already changed. At present, modern life and issues are quite different

सर्ग: थ: हे विस्तृत/१५

and complex and a lot of new issues and challenges are emerging in the ecological systems, surroundings, and life supporting mechanisms. The people of today, their habitat's status, their work and other activities influence the topics and contents of modern haiku. Modern haiku poets need to consider not only nature, but other components such as physical, biological, social, economic and cultural aspects. Therefore, this is the only way to express the carrying capacity of resources, needs of people, as well as present and future development. He has also given some examples of modern Nepalbhasa haikus. The workshop was participated by haiku poets, poets, writers, journalists and critics. His concept was new not only to Nepal but to the other countries as well. The participants accepted this concept and expressed their views to implement this modern concept.

Source: Kigo database, <http://kenyasaijiki.blogspot.com/>

तालिका १ “थौँया हाइकु”या विशेषता

१. विषयवस्तुइ व्यापकता व विविधता : प्रकृति जक मखु, ‘थौँया हाइकु कविता’या विषयगत क्षेत्रत - भीषिं म्वानाच्चनागु लकस, लकसया विभिन्न श्रोत, व्यवस्था, जीवनं भोगय् यानाच्चंगु जिन्दगी, मनू व मेपिनापया स्वापू, जीवन पद्धति व संस्कृति, विकास, युद्ध, प्रकोप, विज्ञान, व मेगु विविध विषयत) न्ह्यागु जुइफु अर्थात विषयवस्तु सीमाहीन ।
२. भौतिक, प्राकृतिक, सांस्कृतिक, सामाजिक, आर्थिक तथा राजनैतिक तत्व व विविध तत्वनापया जीवनया अन्तर सम्बन्ध, म्वायेगु जीवन दर्शन, अन्तर सघर्ष, विद्रोह व व्यवस्थापनया कुतः ।
३. ‘थौँया हाइकु’इ परम्पराय् थें किगो (Kigo), किरिजी (Kireji) यात समावेश यायेमा: वा प्राथमिकता बिइमा: धयागु अनुशासन मदु । किगो प्रयोग यायेगुसा थ: म्वानाच्चनागु लकस वा जीवनया विभिन्न पक्ष वा विकासया ज्यानाप सम्बन्धित विषययात प्रयोग यायेमा: ।
४. ‘थौँया हाइकु’या संरचनाय् थौँतक नं भिन्हय्ग: आख:ग्व: स्वभव: दुने अभिव्यक्त यानाच्चंगु हे जूसां, कन्हय् वना: थुखेउखे नं जूवनेफु, न्हूगु

स्वरूप नं बुया: व्वलनेफु ।

५. 'थौया हाइकु'इ सिर्फ सतहलं जक स्वया: विषयवस्तुयात, घटनायात खनेवं अभिव्यक्त याइ मखु । स्थिति, घटना, प्रकोप, समस्यायात व्यापक रुपं चिन्तन, मनन याना: अभि स्पष्ट धायेगु ख:सा एकीकृत रुपं छानविन याना: अभिव्यक्त याइ ।

६. 'थौया हाइकु' फगत वर्णन जक मखु, थ्वं ला थौया भीगु विकास, संघर्ष व म्वायेत यानाच्चंगु कुत:यात नं व्वइ, थ्व नापं कन्हय् वनेमा:गु नीतिगत दिशा संकेत नं याइ ।

७. 'थौया हाइकु'या विम्व संप्रेषणीय जुइ । थ्वं व्वइगु कृपा व्वमिपित थ:गु न्ह्य:ने दंव:थें, थमं खनाच्चवंथें आभाष याकिइ ।

८. 'थौया हाइकु' विषयवस्तुयात बोध याका: चेतना थनाबिइ, थ्वया लिच्वलं न्ह्यपुइ तरंग हयाबिइ ।

श्रोत : आनन्द जोशी (१९३३ख)

थौया हाइकुया वारे सिद्धान्त, तत्व तथा विभिन्न सम्बन्धित पक्ष आ: स्पष्ट जुयावंगु दु । छगू अभियानया रुपय् "खँव: सीमाहीन : सीमाहीन जि" सफू नं शुरु जूगु थौया हाइकुया यात्रायात अभि सुदृढरुपं न्ह्याकेत ब: बिल 'नेवा: हाइकु' निलापौया प्रकाशनं । थ्व कुतलं यक्व न्हून्हूपिं हाइकु च्वमितय्त प्लेटफर्म नं उपलब्ध याना ब्यूगु दु । थ्व यात्राय् छगू महत्वपूर्ण उपलब्धि नं हासिल जुल - व ख: म्हिग: तक्क उपेक्षित हाइकु - धा: कविता विधाया विस्कं धा:या रुपय् स्थापित जुल । थ्व हे सिलसिलाय् डा. आनन्द जोशीया न्हूगु थौया हाइकु मुना 'जि न्हूगु लँय् : चेतनाया लवु' पिहां वया: थौया हाइकुयात भन चकंका यंकेत ग्वाहालि या:गु दु । आ: तक थौया हाइकुं क्वय् उल्लेखित क्षेत्र कघाना: न्ह्या:वनाच्चंगु दु ।

ऋतु व थौया जीवनया प्रसंगनाप सम्बन्धित पक्ष

परम्परागत हाइकुइ ऋतुयात छगू मुख्य तत्वया रुपय् अंगिकार यानात:गु दु । भीगु हाइकुइ नं थ्व तत्व व थ्वया सम्बन्धित विभिन्न पक्षयात अभिव्यक्त याना: वयाच्चंगु दु । तर ऋतु देय्देय्या जलवायु, भौगोलिक वनावट अनुसार फरक फरक जुइगुलिं व थौया जिन्दगीया स्वापू भौतिक संरचनानापं यक्व क्वातुयावंगुलिं ऋतुयात हे व:कया थौया हाइकु सिर्जना यायेगु अनिवार्यता

सर्ग: थ: हे विस्तृत/१७

तापाना वन । तर ऋतुयात ऋतुया रुपय् जक मखु, जिन्दगीया क्रियाकलाप,
जिन्दगीया दैनिक प्रकृया, जिन्दगीं यानाच्चंगु अनुभवलिसे सम्बन्धित याना
थौया हाइकुइ व्यक्त याना वनाच्चंगु दसि क्वय्या हाइकुइ स्पष्ट जूगु दु ।

स्वां हे मट्वनि	चिकुलाया न्हि
वसन्त लिहां वन	निभा: पाना: हे फुत
नुग: कथं सू ।	लं स:ताच्चन ।
- दया खड्गी 'बेचैन' (११३२)	- डा. आनन्द जोशी (११३०)

सिमाह: संसां
भ्या:भति हे फय् मव:
उखें थखे नं । - कृष्णभक्त श्रेष्ठ (११३२)

श्रोतया स्थिति तथा उपयोग

लकसय् उपलब्ध विभिन्न श्रोत व जीवनया स्वापू सन्तुलितरूपं कायम याना
यंकेफ:सा जक निरन्तररूपं म्वायेत ग्वाहालि जूवनी । तर थौकन्हे उपलब्ध
श्रोतयागु उपयोग य:य:थें, थ:त छिंक, कन्हेया च्यूता: तक नं मतसें याना:
वनाच्चंगुलिं यक्व समस्या खनेदया: संकटकालिन अवस्थाय् थौं जिन्दगी
लाना: वनाच्चन । थ्व हे विषय विभिन्न विम्वयात व:कया: क्वय्या हाइकुइ
अभिव्यक्त जूगु दु । गथेकि क्वय्या खुसिया जीवनया लागि, क्वय्या लकस
व जिन्दगीयात नं ल: आवश्यक धयागु खँ महशुस मयासे, थ्व तथ्ययात
च्यूता: तक नं मतसे य:य:थें ल:या उपयोग (विद्युतया लागि वा मेगुया लागि)
याना: वनाच्चन । थन्या:गु ज्यां विभिन्न समस्यात बुयाव:गु यथार्थ क्वय्या
हाइकुइ व्यक्त जूगु दु । थथे हे विकासया नामय् म्वायेगु वाध्यताय् थौं व
कन्हेया परिणामयात वास्तातक नं मतसे कार्यान्वयन या:गु ज्याया लिच्वलं
स्थानीय वातावरण व श्रोत नं विचलित जूगु किपा क्वय्या हाइकुं व्व:गु दु ।

ल:या प्रयोग	वाग्मती खुसी
मतं गां भलमल्ल	सुकुम्वासीं त्यलावी
क्वय् खुसि सुख्वा ।	खुसी इइपं ।
- डा. आनन्द जोशी (११३३)	- भानुमति श्रेष्ठ (११३२)

विकास नामय्
छं सिमा ध्यन गुँइ
बाढीग्रस्त गां ।

- डा. आनन्द जोशी (१९३३)

सामाजिक जीवनय् वःगु हिउपाः व प्रभाव

ई अनुरूप विकासया द्रुततररूपं न्ह्याःवनाच्चंगु क्रमं भीगु सामाजिक जीवन पद्धति, व्यवहार व आचरणय् नं प्रभाव लानाः बांलाःगु तथा बांमलाःगु उपलब्धि खने दयाच्चन । जनसंख्या वृद्धि थौंया छगू तःधंगु समस्या खः, जंगल तक नं अतिक्रमण जुयाः वनाच्चन, शहर मनूतयगु जंगलय् परिणत जुयाः पारिस्थितिक सन्तुलनय् बांमलाःगु प्रभाव लाना वनाच्चन । थन्याःगु योजनाहीन न्ह्याकूगु ज्यां चेतना दया नं थौंया मनू यन्त्र (रोबोट) जुयाः म्वायेत वाध्य जुयाः वनाच्चन । थ्व क्रमय् वरु भौतिक यन्त्र हे संवेदित जूगु विम्व न्ह्यःने थनेहयाः भी प्रति हे व्यंग व्ययातःगु दु क्वय्या हाइकुं ।

छगू जंगल
धुँ भालु किसि मदु
मनूत मन्ह्यं ।

ज्याथः लँय् दल
वनाच्चन मनूत
गाडित दित ।

- बुद्ध नेवाः (१९३२)

- डा. आनन्द जोशी (१९३३)

विकास व थुकिया प्रभाव

म्वायेत माःगु आधारभूत आवश्यकता पूर्ति यायेत, भौतिक, तथा आर्थिक सुविधा उपलब्ध याना वनेत विकासया श्रृंखलाया दौडय् यक्व उपलब्धिनापं समस्या नं पिज्वयाः थौकन्ह्य् जिन्दगी त्रस्त स्थितिदुने कैद जुयाः वनाच्चन । यक्व अस्वभाविक, अव्यावहारिक, असोचनीय लिच्चः खने दयाः आर्थिक, सामाजिक, वातावरणीय स्थिति हे प्रतिकूल प्रभाव लाना वनाच्चंगु तथ्य क्वय्या हाइकुइ अभिव्यक्त जुयाच्चंगु दु ।

देशं दे न्यंक
बन्द व हडताल
इरुथिरु जू ।

सुनामि मवः
लः मदु मत नं मदु
छुं छुं हे मदु ।

- माधवलाल कर्माचार्य (१९३३)

- विमल ताम्राकार (१९३२)

सर्गः थः हे विस्तृत/९९

जि जि मखुत
वा वःगु वलं मदी
प्याःगु सिं च्यात ।

- तुयू पुं (११३२)

बुँइ छें सल
मल्हार म्ये ल्वःमन
आलुमना थें ।

- रामभक्त कायस्थ (११३२)

खपया सर्गः
भट्टाया कुँ सुपाँय्
ब्यांचा आसां द्याः ।

- सौरभ शाक्य (११३२)

च्वापु-गुं नाल
हिमताल तज्जाल
भयाक्रान्त गां ।

- डा. आनन्द जोशी (११३३क)

ताःचा प्वांय् ल्हातय्
देय्या धुकुती सुचु
जिगु खाः बुलु । - बद्री बेदना (११३२)

जन-सहभागिता व एकिकृत व्यवस्थापन

न्त्याथेन्याःगु जीवित तत्वयात गति प्रदान यायेत व सन्तुलितरूपं उपयोग याना वनेत एकिकृत व्यवस्थापनया तःधंगु महत्व दु, थन्याःगु ज्याय् जनताया सहभागिता तसंक आवश्यक । थौकन्हय् मनूत थुलि सभ्य जुइधुंकलकि छम्हं मेम्हनाप दयेमाःगु स्वापू नं चबुना वनाच्वन । थ्व स्थितिं मनू मनूया पहिचान व स्वापू सम्बन्धय् तःधंगु न्त्यसः थंगु दु ।

छ व जि व्यागः
अहंया लिच्वः गाः गाः
थः थः हे न्त्यसः ।

- डा. आनन्द जोशी (११३३)

भविष्यत् कार्यान्वयन याना वनेमाःगु ज्या

नेपालभाषाया थौया हाइकुया उपलब्धि स्वलधाःसा थ्व धाः नं छगू विस्कं पलाः न्त्याका न्त्याःवनाच्वंगु दु, थ्व गर्वया खँ खः । अभ् नं छुं कमी कमजोरी विद्यमान दनि, थ्वयात भीसं हे योजनावद्धरूपं व्यवस्थापन यानाः वनेत कुतः यायेमाः । थ्व हे सन्दर्भय् आवश्यक पूर्वाधार, गुगु भीगु थौया हाइकुया अभियानयात सफल यायेत माःगु खनेदु, उकियात क्वय् ब्वयेत स्वयाच्वना ।

डा. आनन्द जोशी/२०

१. संस्थागत विकास, थौया हाइकुया अवधारणा व कार्यान्वयन

छु नं न्हूगु ज्या, न्हूगु अवधारणा, न्हूगु लँपुया विकास यायेत मंका: प्रयास आवश्यक दु । थथे team workया रुपय् सशक्त तवरं न्ह्या:वना कार्यान्वयन यायेत संस्थाया भूमिका महत्वपूर्ण जू । हाइकु क्षेत्रय् नं छु दँ न्ह्य: छगू संस्था हाइकु प्रतिष्ठान स्थापित जुल । थ्व प्रतिष्ठानया ग्वसालय् थौया हाइकु सम्बन्धि सैद्धान्तिक पक्ष स्पष्ट यायेत कार्यशाला गोष्ठी संचालन जुल । हाइकु च्वमितय्गु सहभागिताय् संस्थागत प्रयासयात हाइकुया अवधारणा कार्यान्वयन याना वनेत प्राथमिकता बिइमा:गु खनेदु ।

२. जनताया सहभागिता

‘थौया हाइकु’या विकासक्रमय् जनतायात अलगतया भीगु हाइकुया गतिइ गर्व यायेफइ मखु । थ्वया मतलब थ्व दौडय् याक:चा हे ब्वाँय् वना थम्हं थ:त सिरपा: बिया: थम्हं थ:त हे बधाइ वीगु जक जूवनी । थौया हाइकु जनताया जिन्दगी, इमिसं भोगय् यानाच्चंगु न्हिन्हिया पद्धति, इमिगु इच्छा, वाध्यता, विवशता, विद्रोह, सन्तुष्टि व असन्तुष्टिनापं छु नं स्वापू मतसे जीवन्त जुइफइ मखु । थौया हाइकु मनोरञ्जनया खिलौना मखु, थौया हाइकु चटक मखु, थौया हाइकुइ निश्चय नं वर्तमानया विभिन्न पक्ष, थौया मनूया जिन्दगी व म्वायेत लँ मालेगु कुत:यात हाइकुइ थाय् बिया: अभिव्यक्त याना: वनेमा: ।

३. प्रचार प्रसार

भीगु हाइकुया स्तर च्वह्यागु जूसां थ्वयात व्यापकरूपं प्रचारप्रसार मजगुलिं सीमित घेराय् जक म्वानाच्चंगु खनेदु । आ: थ्व धा:यात विस्तृतरूपं जनता व देय्देय्हा हाइकु ख्यलय् थ्यंकेत क्वय्या नीतिगत ज्यायात कार्यान्वयन याना: वनेमा:गु खनेदु -

(क) योजनावद्धरूपं प्रचारप्रसारया ज्या याना वनेत प्राथमिकता बिया: वनेमा:गु दु । इलय् व्यलय् गोष्ठी, सम्मेलन, अन्तरक्रियायात जनताया सहभागिताय् क्रमिकरूपं संचालन याना छगू चेतनाया तरंग थना: बिइमा:गु दु ।

(ख) भीगु हाइकु तथा हाइकु सम्बन्धि च्वसु देसं देसय् थ्यंकेत, अन च्वंपित भीगु हाइकुया स्तर बोध याकेत विभिन्न भाषां अनुवाद यायेगु ज्या महत्व बिया वनेमा:गु दु ।

(ग) नेपा: दुनेया विभिन्न थाय्थासय् नं हाइकु सम्बन्धि पत्रिका, हाइकु सम्बन्धि समाचार थ्यंकेगु आवश्यकता दु ।

४. चिन्तन मनन व भीगु पहिचान

थौया हाइकु छगू अभियानया रुपय् न्ह्याःवना बिस्कं उपलब्धि हासिल यायां वनाच्चंगु दु । थ्व पलाः निश्चय नं थःगु भाय्या लागि जक मखु, थ्व देय्या मेमेगु भाय् व विश्वया विकासोन्मुख देय्या लागि नं छगू उदाहरणया रुपय् स्थापित जुजुं वनाच्चंगु दु । जापानया website नं भीगु थौया हाइकुया अवधारणायात न्हूगु पन, न्हूगु बिचाःया रुपय् न्ह्यानावःगु दु धका उल्लेख याःगु दु । थ्व क्रमयात भीसं सशक्तरूपं न्ह्याकायंकेगु प्रयास यायेमाः । थ्व इलय् गुलि नं थौया हाइकु प्रकाशन जुयाच्चन, थ्व मध्ये बहुसंख्यक हाइकु छगू हे तालं, छगू हे परिधिदुने जक म्वानाच्चंगु खनेदु । थौया हाइकुया लागि विषयवस्तुया लाग्ना छगू बन्धन खः, पःखाः खः, जेल खः । थ्व संकीर्णतां पिहां वयाः, विभिन्न विषयया अनुभूति स्वतन्त्ररूपं अभिव्यक्त जुइमाः । थ्व जुइत भीगु दृष्टिकोणय् म्वानाच्चंगु संकीर्णतायात त्वाथला पिहां वयेमाःगु दु विस्तृतापाखें । निरन्तर अध्ययन, विभिन्न अनुभव व चिन्तन मननं जक पर्याप्त मजुयाः गुबले गुबलें विषयगत क्षेत्रय् अनुसन्धान तक नं यानावने मालेफु, थ्व पाखे भीगु प्रयास निरन्तररूपं न्ह्याःवनेमाः ।

सन्दर्भ सफू व लेख :

डा. आनन्द जोशी, १९३३क, हाइकुया यात्रा व उपलब्धि - छगू सिंहावलोकन, थौया कविता विधा : जीवन्त पलाः, कुतः पिकाक, खप ।

डा. आनन्द जोशी, १९३३ख, थौया हाइकु : छगू अभियान - अवधारणा, स्थिति व नीतिगत मार्गनिर्देशन, थौया कविता विधा : जीवन्त पलाः, कुतः पिकाक, खप ।
Cor van Den Heuvel (Ed.), 1986, *The Haiku Anthology*, Simeon & Schuster, Inc. New York, USA.

कृष्णभक्त श्रेष्ठ, १९३२, कृष्णभक्तया हाइकु, नेवाः हाइकु, दँ १, ल्याः ५, पेज ४ ।

Kaneko Tohta, 2011, *Ikimonofuei - Poetic Composition on Living Things*, Moon Press,


Dr. Gabi Greve, 2013, Kigo Database,

<http://kenyasaijiki.blogspot.com/>

Georg Swede, 1997, *Haiku in English in North America*, *Canada Newsletter*, Vol. 10, No 2-3

डा. आनन्द जोशीया

सर्गः थः हे विस्तृत



१.


देय् ब्यस्त युद्धय्
ब्वाय् जुल द्यांक बुँइ
भ्रूण्या हत्या ।

२.

यन्त्रं क्यन लँ
जि तन लँया जालय्
बल्सि लाःम्ह न्या ।

३.

ताःन्वःगु ऋतु
खः लः नं ज्वालामुखि
त्रस्त कोरल^१ ।



स्वस्थ व जलवायु परिवर्तनं प्रभावित कोरल, श्रीलंका ।

फोटो : डा. आनन्द जोशी

^१ कोरल = समुद्रय् दइगु मेरुदण्डविहीन प्राणी । थुपिं जलवायु परिवर्तन पाखें तसकं संवेदितरुपं प्रभावित जुइपिं प्राणी खः ।

सर्गः थः हे विस्तृत/२५

४.

सूर्य ग्रहण

थौं ख्युं व्याप्त देय् न्यंक

गंकि ! मुक्ति ज्व ?

५.

चा मुन तालय्

कय्कुना: वन लागा

ह्युपा: हे पंग: ।



चा मुना वनाच्यंगु रुपा ताल, पोखरा ।

फोटो : डा. आनन्द जोशी

६.

गाडि लँय् दित

थ: थ: ल्वात, घटना

छन्ध देसं दे

डा. आनन्द जोशी/२६

७.

थौं बस्ती खालि
नसा माःवन भंग
खोज म्वाय्त लँ ।

८.

‘जि’ सीमाहीन
सीमाना देय् देय् बिचय्
सभ्यया दसि ।

९.

नाइग्रा फल^२
लः : निरन्तर गति
आनन्द जोशी



नाइग्राफल, अमेरिका ।

फोटो : डा. आनन्द जोशी

^२ नाइग्रा फल = स्वंगू भरनायागु मंकाः नां खः नाइग्रा फल, छगू भरना
क्यानेडा, मेगु निगू भरना अमेरिकाय् दु । थ्व भरनायागु प्रवाह तसकं
सशक्त ।

सर्गः थः हे विस्तृत/२७

१०.

नांगागु सीमा
वा वल, चा, बँ प्यात
सीमाय् ओएसिस् ।



ऋतु परिवर्तन, स्पाइ पोन्ड, बोस्टन, अमेरिका ।

फोटो : डा. कुन्जनी जोशी

११.

बम तज्यात
सुनामी वल, वन
आस्था-छँ दुन ।

१२.

लःधाः ल्वहंतय्
लः फुतिं जि निथ्रुक
चेतनाया मि ।

डा. आनन्द जोशी/२८

१३.

भी न्हाथाय् याकः

इमूया आस्था : पुचः

ब्यागः थौया ल्वय् ।

१४.

इयाम दन छं

आः न्याया गति घेराय्

कय्कुन सर्गः ।



इयाम, अरनको राजमार्गया लै स्थित्य् ।

फोटो : डा. आनन्द जोशी

१५.

जि परिक्षणय्

ल्वय् मखु, प्रयोगय् जि

जि न्हावःसा थौ ।

सर्गः थः हे विस्तृत/२९

१६.

कुं आक्रान्त गां
सिँ : वैकल्पिक उर्जा
सन्धि म्वायेत ।



कुं त्वःपूगु गां, गुफा बजार, संखुवासवा ।

फोटो : डा. आनन्द जोशी

१७.

स्वापुती शंका
सम्भौता सिर्फ ख्यालः
स्वार्थ-पन्जाय् भी ।

१८.

छं मि च्याकल
बारं पने मफु मि
ह्युपाः चकन ।

१९.

बल्सी तल छं
न्यां माल न्याय म्वाय्त
रित खारेज ।

२०.

खुसि तन बँय्
लःया गतिया अन्त्य
लः खः, लँ दयकि ।

२१.

थौं फेवा त्रस्त
जलकुम्भीया सेनां
खोज विकल्प ।



फेवा तालय् जलकुम्भी ।

फोटो : डा. कुन्जनी जोशी

सर्गः थः हे विस्तृत/३१

२२.

बुँया चा फिसः
खुसि नं प्रदूषित
स्तव्य विकास ।



प्रदुषित खुसि व नुँ नारायणघाट ।

फोटो : डा. आनन्द जोशी

२३.

सः थव्याच्चन
गुँया कापिइ इवाला
म्वाय्गु दर्शन ।

२४.

चुं दल न्हाय्कं
खण्डित ख्वाः, जि मखु
जिं हिला न्हाय्कं ।

डा. आनन्द जोशी/३२

२५.

भीड भीडय् जि
चक्रव्यूहलय् जि, थौं
देया यथार्थ ।

२६.

ल्हवंतय् घाँय् बुल
स्वापू लः व जीवया
नग्न यथार्थ ।



समुद्रया ल्वहं व जीवन, वेस्ट मिडो बीच, न्यूयॉर्क ।

फोटो : डा. आनन्द जोशी

२७.

ध्याचः लँय् तुति
नेताया आश्वासन
शून्य हे लिच्चः ।

२८.

दुर्गन्धित लः

लः त्वँत्वं भ्रंणः मन्त

न्ह्यसः व्यवस्थाय् ।



प्रदुषित लः त्वनेवं सीम्ह भ्रंणः, विराटनगर ।

फोटो : डा. आनन्द जोशी

२९.

वा वल, मदि

यःत्यः मयाः वां, लखं

आनन्द जोशी ।

३०.

बन्दं त्रस्त दे

‘जि’, ‘भी’, ‘थः’ तन गुफाय्

थौया त्रासदि ।

डा. आनन्द जोशी/३४

३१.

फोहर लखं

इन थःत बुँइ, चाय्

वसन्त बुल ।

३२.

च्वापुधि नाल

सन्तुष्ट लः सुसां बैय्

आस्था कन्हेया ।



नायाः वनाच्चर्गु च्वापु, लामटाङ्ग ।

फोटो : डा. आनन्द जोशी

३३.

याकः लँजुवाः

मू धालं अलग जि

जि म्वाय् न्हू दिशा ।

सर्गः थः हे विस्तृत/३५

३४.

संत्रस्त भंगः

प्रदूषित ताल, लः

अस्तित्व बोध ।



ताल्य् हैय, क्लिभल्याण्ड, ओहिओ, अमेरिका ।

फोटो : डा. आनन्द जोशी

३५.

थः जक म्वाय्गु

व्यवस्थां क्यंगु लँपु

यात्रा ख्युं गुफाय् ।

३६

हि न्ह्यात लँय्, बँय्

मानवता शो-केसय्

धापय् प्रगति ।

डा. आनन्द जोशी/३६

३७.

बाढी त्वपुल

उपलब्धि बगर

अपांग लिच्चः ।



बगरय् परिणत जूँ, पालुङ्ग, त्रिभुवन राजपथ ।

फोटो : डा. आनन्द जोशी

३८.

गुँइ निभाः दु

ख्वाँउं आक्रान्त बस्ती

मिं स्वार्थ-जालय् ।

३९.

छवय्कल बन

जन्तुं त्वतावन बाय्

भताभुंग दे ।

सर्गः थः हे विस्तृत/३७

४०.

हिउँ लँय्, बँय्, छँय्
लः जुया न्ह्याय् आतुर
गति जीवन ।



कार पाकिङ्ग्य् च्वापु, क्लिभलाण्ड, अमेरिका ।

फोटो : डा. आनन्द जोशी

४१.

क्वः हालाच्चन
यन्त्रवत् पलाः भीगु
हिलावंगु मू ।

४२.

ताल निश्चल
द्यनाच्चन शहर
गर्भय् दु लाभा ।

डा. आनन्द जोशी/३८

४३.

चिकुलाया न्हि
च्वापु बँय्, लँय्, गाडिइ
ई स्वयं वासः ।



कार त्वःपू च्वापु नायाः वनाचंगु लु, क्लिभलाण्ड, अमेरिका ।

फोटो : डा. आनन्द जोशी

४४.

स्वतुस्वःगु लँ
जि व्यवस्थाया जालय्
धापय् थः, कुतः ।

४५.

देसं दे माल
ब्यागः न्ह्यपु, ल्हाः-तुति
थों दे म्हुतु, प्वाः ।

सर्गः थः हे विस्तृत/३९

४६.

छँया जंगल

शहर माखापिखा

मुक्ति-लँ जालय्



स्वयम्भू ये देय्या लु ।

फोटो : डा. आनन्द जोशी

४७.

थ्व स्वतन्त्रता

चटकिं क्यंगु जादू

भ्रमय् ई, भरीपिं ।

४८.

छ्वयाच्चन देय्

लःया देय् थ्व, लः मदु

विडम्बनाय् भरी ।

डा. आनन्द जोशी/४०

४९.

आनन्द जोशी

ख्युं न्हुयावंगु पला:

निभा: लकसय् ।

५०.

समुद्रय् लबु

आक्रमण सिइ, बँय्

जिं थना: प:खा: ।



समुद्रया लः पनेत दनातःगु पःखाः, माले, माल्दीभस् ।

फोटो : डा. आनन्द जोशी

५१.

जि, जिगु किचः

किचः हे पंगः यात्राय्

मू हे न्ह्यसः थौं ।

सर्गः थः हे विस्तृत/४९

५२.

खुसि थः हे ताः

व खुसि थः हे बाढि

ईब्बःया लिच्चः ।

५३.

विषयुक्त लः

प्वंकल लः खुसिइ

संकटय् प्राणी ।

५४.

बुँ चलः वन

लखं चा चुइकल

खण्डित स्वापू ।



चलः वंगु बुँ ओखरपौवा ।

फोटो : डा. आनन्द जोशी

डा. आनन्द जोशी/४२

५५.

लँ दय्काच्चन

धू, ध्याचलं आक्रान्त

देया व्यवस्था

५६.

न्हूदँया सुथ

लकसय् गंया सः

चेतनाया लः ।

५७.

वा वयाच्चन

गाः गाः दु लँय्, लः न्ह्यात

अदृश्य धाप ।



जमलय् वा वयाः लः मंगु ।

फोटो : डा. आनन्द जोशी

सर्गः थः हे विस्तृत/४३

५८.

विस्थापित घाँय्

त्वता: थकूम्ह मचा

बायावंगु बँ ।



पोर्ट, पोर्ट ज्याफर्सन, न्यूयॉर्क ।

फोटो : ई. रिकि जोशी

५९.

गंगु हःत लँय्

पला: न्ह्याका:, स: थ्वल

विरोधया स: ।

६०.

भी चाकला लँय्

रेलया यात्रा लिगय्

ह्युपा:हीन ई ।

डा. आनन्द जोशी/४४

६१.

लँ तब्याः जुल

बुद्धि अभू नं गल्ली

मनू प्यकालँय् ।

६२.

संवेदित बँय्

योजना विनाया लँ

श्रोतया नाश ।



निर्माणाधिन वसन्तपुर - गुफाया लँ ।

फोटो : डा. आनन्द जोशी

६३.

न्ह्यःने त्वादेवा

ल्हाः नं मडु च्याकेत

अस्तित्वया घाः ।

सर्गः थः हे विस्तृत/४५

६४.

फय् थःगु हे लँय्
वं थियावन भीत
तरंग न्ह्यपुइ ।

६५.

तछलाया ई
नँ न्यात, मलः जुल
संबात आस्था ।

६६.

त्रसित टापू
व्यस्त अस्तित्व-युद्धय्
स्थायित्वया लँ ।



माल्दीभया छ्वा टापू ।

फोटो : डा. आनन्द जोशी

६७.

चिकुं ग्रस्त ई
हिउँ लकसय्, फसय्
बँ वया आज्जु ।

६८.

कित्ता कात बँय्
सर्गः थः हे विस्तृत
आनन्द जोशी ।



नगरकोटं खनेदुगु सर्गः ।

फोटो : डा. आनन्द जोशी

६९.

गुं च्वापु नाल
खुसि जुल जीवन्त
चा न्ह्यलं चाल ।

सर्गः थः हे विस्तृत/४७

७०.

यन्त्र जीवन
द्यने मखं शहर
विकृत लुपाः ।

७१.

पःखाः क्वदल
न्ह्यात लःया प्रवाह
लःया धाः हे लँ ।

७२.

चलं वःगु गुँ
थौ देया अर्थतन्त्र
ल्ह्वं-चां त्यल 'जि' ।



चलः वंगु गुँ त्रिभुवन राजपथ ।

फोटो : डा. आनन्द जोशी

७३.

लः मुन गालय्

लः लिकुन, ध्वगित

आः चाय्केमाः धः ।



लः मुनाच्यंगु लीहति, धरहरा, वै ।

फोटो : डा. आनन्द जोशी

७४.

स्वतन्त्रता : लँ

द्वहंत लँय् दथुइ

आज्जु संकटय् ।

७५.

बल्सी तल वं

खँया माखापिखाय् भी

नेताया न्वचु ।

सर्गः थः हे विस्तृत/४९

७६.

गरिबया सः

म्हुतु तिनाबिल मेघं

नाइ, सः पिज्वै ।

७७.

दलदलय् जि

स्वचानावन आस्था

जगहीन बः ।

७८.

बाग्मति साःगाः

ल्वय् ब्बलंगु लकस

भ्नी स्वयं गालय् ।



बाग्मती खुसिइ चंगु फोहर ।

फोटो : डा. आनन्द जोशी

७९.

लँ लँया जाल

तक्यन भीपिं व्यूह्य्

व्यवस्थाया अंग ।

८०.

थौं गुन्हिपुन्हिं

ख्यालः : देया यथार्थ

चेतनाया धाः ।

८१.

कुरुप सिमा

बलात्कृत जीवन

शोषित विम्व ।



अति उपयोगं त्रस्त कटुस, मंगलवारे, संखुवासवा ।

फोटो : डा. आनन्द जोशी

सर्गः थः हे विस्तृत/५१

८२.

घुम्तीइ जि, छ
मोड, व आज्जु मखु
आः, न्ह्याःवने जि ।

८३.

हः मदु सीमाय्
तपस्याय् लिन साधु
आस्था ऋतुइ ।



हः पियाच्चंगु सिमा, क्लिभलाण्ड, अमेरिका ।

फोटो : डा. रुवी जोशी बाताजु

८४.

मिं छ्वल छँआ
भी भी दथुइ ल्वापु
स्वापूया हत्या ।

डा. आनन्द जोशी/५२

८५.

लँय्, बँय् हिफुति
तुति न्ह्याःवन हिइ
मि पुत भीत ।

८६.

दिल्ला, वा वल
गालय् मुन लः, कैद
लखं दय्कि लँ ।

८७.

अस्थिर गुँ, बँ
चलं वना त्रस्त थाय्
व्यवस्था याय् जिं ।



शिवालिक क्षेत्रया ले व गुँ ।

फोटो : डा. आनन्द जोशी

सर्गः थः हे विस्तृत/५३

८८.

ध्याचः लैय् बग्गी
ध्वाना चनेत वाध्य
दासता ! मुक्ति ?

८९.

तां स्वात गुं गुं
न्ह्याःवन स्वापूया लैय्
आनन्द जोशी ।



खिम्टी खुसिया कुईकुईताय हाइजिन आनन्द जोशी ।

फोटो : डा. आनन्द जोशी

९०.

छ ब्वाय् वल लैय्
चिला बिया जि सिथय्
न्हू पिंढी न्हू लैय् ।

डा. आनन्द जोशी/५४

**डा. आनन्द जोशीया हाइकु सम्बन्धि
विभिन्न साहित्यकारपिनिगु थःथःगु घापू**

● “खँवः सीमाहीन : सीमाहीन जि” नांगु हाइकु मुनाया पिथना नेपालभाषा काव्य ख्यलय् छगू न्ह्यथनेवहगु घटना जूवःगु दु । वय्कःया कविता अप्वः याना वचचाये न्ह्यः भाव व भावना परिपाक जुयाः क्रियाशील जुयाः चेतनायात माःकथं सक्रिय यायेगुली संलग्न जुयाच्वंगु खनेदु । थ्व वय्कःया कविताया विशेषता हे धायेमाः । धाये, प्रभावित यायेगु कुतः वा संकेत यायेगु थ्व संकेतात्मकता हे वय्कःया हाइकु कविताय् निहित सौन्दर्य खः । थुकी हे वय्कःया तातुना व रचना कौशल मेमेपिं हाइकुमिपिनिगु तातुना व रचनाकौशल लिसेयागु भेद दुपिनाच्वंगु सियेदु ।

- **माधवलाल कर्माचार्य**, (ने.सं. १९३२), आनन्द जोशीया हाइकु मुना “खँवः सीमाहीन : सीमाहीन जि”, नेवाः हाइकु, दँ १, ल्याः ५, पौ २०-२२ ।

● हाइजिन आनन्द जोशीया हाइकु कविताय् विषयवस्तुइ विविधता खनेदु । आनन्द जोशीया हाइकु कवितां भीगु हाइकु कविताया ख्यलय् छपलाः न्ह्याकेगु ज्या जुउगु दु । न्हूगु कविता ख्यलय् आनन्द जोशीया गुगु थाय् दु हाइकुइ न उगुकथंया थाय् कय्च्यायेत हाइजिन आनन्द जोशी सफल जुउगु खनेदु ।

- **इन्द्र माली**, (ने.सं १९३२), नेपालभाषा हाइकु ख्यलय् कवि आनन्द जोशी, भी हाइजिन : भीगु हाइकु, पौ ४४-५०, कुतः पिकाक, खप ।

● अनेक कथंया मौलिकता न्ह्यव्वयेगु आनन्द जोशीया विशेषता खः । “खँवः सीमाहीन : सीमाहीन जि” हाइकु सफुतिइ थीथी सवाःया हाइकु दु, मौलिक संरचना दु, सामाजिक सचेतनाया सः दु, स्वतन्त्र रुपं व्वयेगु फय् दु, सामाजिक विकृति विसंगतियात हरुहरुं च्याकेगु मि दु । उकें थ्व फय् खः, मि खः ।

- **डा. पुष्पराज राजकर्णिकार**, (ने.सं. १९३२), फय् खः मि खः आनन्दया हाइकु जिगु मिखाय्, नेवाः हाइकु, दँ १, ल्याः ४, पौ १३-१४ ।

● न्हू चेतना, विचार, शैली व प्रवाह ज्वना स्थापित जूम्ह कवि आनन्द जोशी कविताया मुक्त आकाशं हाइकुया अतिकं हे परिमित संरचनाय् न्ह्यंक वःगु दु । कवि जोशीं प्राकृतिक व सामाजिक विम्व व प्रतीकपाखें थौंया ईयात, उकिया लिच्वःयात संवेदित याःगु दु । ... जीवनय् वगु तःधंगु हिउपाःयात थुइकेत हाइकुइ विषयया व्याप्ति, संरचनाय् छुं हिउपाः व कविता तत्व नं दयेमाःगु खँय् चर्चा व बहस यायेफइगु अवस्थाया लागिं कवि जोशीं थुकिइ थःगु विचाः नं प्वंकातःगु दु । नेपालभाषाय् च्वयाः हयाच्वंगु न्हू विधाकथं हाइकुयात मौलिकता बित व थ्वया

सर्गः थः हे विस्तृत/५५

स्वरूपया निरूपणया लागिं नं च्वमिया अभिमत सकारात्मक तायेकेमाः ।

- **ध्रुव मधिकमि**, (ने.सं. ११३१), कवि आनन्द जोशीया हाइकु : जीवन व प्रकृतिया थीथी सन्दर्भ, नःलि, दँ ६, ल्याः ६, पौ १३-१५ ।

● डा. आनन्द जोशी नेपालभाषा साहित्य ख्यलय् दकलय् उच्च सम्मान 'श्रेष्ठ सिरपाः' पाखें सम्मानित जुयाच्चनादीम्ह व्यक्तित्व खः । साहित्य ख्यलय् वय्कलं कविताया माध्यमं नेपालभाषा साहित्य थपू यायेत आपालं योगदान यानादीगु दु । वय्कःया कविता लेखन शैली व प्रस्तुतिइ थःगु हे मौलिकता खनेदु थें आःया हाइकु लेखनय् नं थ्व हे स्तरीयताया प्रतिविम्ब खने दयाच्चंगु दु ।

- **नरेशवीर शाक्य**, सम्पादक, नःलि, दँ ६, ल्याः १, ज्येष्ठ २०६७, पौ ३१ ।

● वय्कलं (आनन्द जोशीं) शुरुशुरुइ गद्य कविताया धाः न्ह्याकादिल अथे हे हाइकु नं न्ह्याये थें मन्ह्या थें न्ह्यानाच्चंथाय् खुसि जुयाः नेपालभाषाया हाइकुया ख्यलय् लुयावल । वय्कलं हाइकु जक च्वयेगु मयासे नेपालभाषाया हाइकुयात गुकथं न्ह्यज्याका यंकेगु धयागु अवधारण दयेका छगू ज्यापौ च्वयादिल । ...गुकिं नेपालभाषाया हाइकुयात न्ह्याकेत कार्यदिशा तय जूवंगु दु ।

- **बिमल ताम्राकार**, (ने.सं. ११३३), लुपाः, थौया कविता विधा : जीवन्त पलाः, पौ ३ ।

●सिद्धहस्त प्रगतिवादी कवि व आँट भय्ब्यूम्ह हाइजिन डा. आनन्द जोशीया हाइकु व्वनेधुंकाः सुं नं व्वमिपिन्सं वय्कःयात 'अभियानया न्हूधाः' मखु धकाः धाये हे फइमखु । ...नेपालभाषा हाइकु ख्यःया सीमायात थ्व (खँग्वः सीमाहीन : सीमाहीन जि) सफुतिं अभ्र अप्वः चकंका ब्यूगु दु ।

- **दया खड्गी 'बेचैन'**, (ने.सं. ११३२), ताल्जुइ डा. आनन्द जोशीया "खँग्वः सीमाहीन : सीमाहीन जि" व्वनेधुंकाः, नेवाः हाइकु, दँ २, ल्याः १, पौ १८ ।

● नेपालभाषा काव्य ख्यलय् प्रतिस्थापित नांजाःम्ह कवि डा. आनन्द जोशीजुं नं हाइकु च्वयाः सफू पिथनादीगु लसताया खँ खः । चेतनाया ल्हाःतं ह्युपाःया ध्वाँय् ज्वनाः न्हूगु लँपु दयेकेगु अभियानय् छगू स्वरूप, न्ह्यव्वयाः काव्यया ग्वःफसय् तनाच्चंगु शून्यतायात हाथ्या बियाः जल्ल थीगु सुथ हयाः सीमाहीन खँग्वलय् प्यखेरं न्यनाच्चंम्ह आनन्द जोशी, नेपालभाषा काव्य ख्यलय् न्यानाच्चंगु गं खः, गुकिया सलं जःयात नं चिरफर यानाः व्वनाच्चनी ।

- **ईश्वरीमैया श्रेष्ठ**, (ने.सं. ११३१), 'खँग्वः सीमाहीन : सीमाहीन जि' दुनेयाम्ह आनन्द जोशीयात खनावलय्....., नेवाः हाइकु, दँ १, ल्याः २, पौ १४-१५ ।

डा. आनन्द जोशी/५६



प्रा. डा. आनन्द जोशी

प्रकाशित सफू

कविता

- विस्थापित जि जि मबु
- कोशाल्वहं
- तज्याःगु फुजियामा : विद्रोहया छसः
- आनन्द जोशीका कविताहरु
- आनन्द जोशीया स्वतन्त्रता

हाइकु

- खंग्वः सीमाहीन : सीमाहीन जि
- न्हूगु दिशाय जि : चेतनाया लबु
- सर्गः थः हे विस्तृत

ज्वसु

- थौया काव्य विद्या : जीवन्त पला:

विविध

- आनन्द जोशीया कविता ... कविता ताल्जुइ
- Environmental Management and Sustainable Development at the crossroad (मंका: ज्वज्या)
- Ethnobotany and Indigenous knowledge in Himalaya (मंका: ज्वज्या)
- Environmental Impact Assessment: Process, Methods and Practices in South Asia (मंका: ज्वज्या)
- Safeguarding the future, securing Shangri-La (मंका: ज्वज्या)

डा. आनन्द जोशीया हाइकु सम्बन्धि धापू

● प्राकृतिक दृश्य, वातावरणीय स्थिति (हास व संरक्षण), जीवनया प्रसंग, जीवनय घटय जुइगु घटना, मानवीय क्रियाकलाप आदिपाखें जुइगु अन्तर अनुभूतियात गथे कवि अनुभव याःगु ख, अथे हे खंग्वल अभिव्यक्त यायेगु हे हाइकु खः । मेकथं धायेगु खःसा अनुभूतिया चरमक्षणया कविता खः - हाइकु ।

● हाइकुइ थम्ह खंगु, थम्ह भोगय याःगु, थम्ह अनुभव याःगु खं अभिव्यक्त जुइमा, थ्व खनिबलय् खमि व हे खं, व हे दृश्य, व हे घटना वा अन्तर सम्बन्ध वा अन्तर प्रतिक्रिया न्यःने दंबः थें, थम्ह हे खना थें, थम्ह हे भोगय याःगु थें आभाष जुइमा, चेतना थनाः विइमाः । थ्व जुइत हाइकुइ दकसिबे दयेमाःगु ला कविता खः, कविताहीन हाइकु छपाः भ्वं जक साबित जुइ ।

● जि स्वये - कवि ज्वइगु हाइकु मि खः, थ्व भौतिक रुपं ला पुइ मबु । तर व हे मिं भ्रीदुने चेतना थनाः न्यपुइ तरंग हयाविइ । थ्व हे हाइकुया सफलता खः ।

● “थौया हाइकु” थौया क्रियाः खः । थौया हाइकु ज्वमिया धरातल ला थौया सर्गः, थें, लः, फय, जीवन पद्धति, व्यवस्था, विकास, उन्नति, विनाश, ध्वंश, आस्था, अनास्था, दुर्घटना, आत्मआलोचना आदि नाप सम्बन्धित जुइ, जुइ हे माः । ... थौया मनुखं खंगु, अनुभव याःगु ज्वमिया, जिन्दगीया संघर्ष, प्रगतिया कुतः, कन्हय्या प्रति आस्था, कन्हय्या सम्पन्न लैया खोजयात प्रतिनिधित्व यायेत इनाबःगु अभियान खः - “थौया हाइकु” ।

● “थौया हाइकु”या अवधारणाय् स्वंगु जेवयात एकिकृत रुपं स्वयेमाःगु पाखे जोड वियातःगु दुः जीवन, लकस व विकास । थ्व अवधारणाय् थौया जिन्दगी भोगय याःगु ज्वमिया स्थिति, अन्तर सम्बन्ध, अन्तर विकास व छगुलिं मेगु लिसे लाइगु प्रभाव प्रभावित जुइगु अवस्थायात उल्लेख याःगु हाइकुया विषयवस्तुयात एकिकृतरुपं विश्लेषण याःगु बनेत दिशा संकेत याःगु दु ।

ISBN 978-9937-8701-6-0



9 789937 870160